

Sää'mtee'g'g kiõllpoliittlaž linnjummuž kuõskee'l Muumlie'kk-programmräaid

Yle puu't'tat Sää'mtee'g'g e'tkkõõzzâst Muumlie'kk-programmräaidast du'bbjum versioid kooumin sää'mkiõlin. Sää'mte'g'g lij leämmaž čâapp õhttsažtuâjast čõdđ puu't'temprosee'ss nu'tt Ylein ko še Muumlie'kk-programmräaid puu't'tam Gutsy animationsin. Sää'mtee'g'g kiõččâmkuu'l'mest õhttsažtuâj mie'rren lij leämmaž ta'rjjeed ä'sstobddmõõžž jeä'rben sää'mkiõlle õhttneei kõõččmõõžžin da tän tuâj tuärjjan Sää'mte'g'g lij tu'mmjam linnjummuž kuõskee'l Muumlie'kk-programmräaid kiõl. Linnjummuž mie'rren lij tuâimmâd vuäppõssân prograamm kiõl'laž va'lljummsid da tøn kõskksa ää'sš lie õll kvalite'tt, sää'mkiõli jealltummuž tuärjjeem, sää'mkiõli kiõl'laž määnghämmsažvuõđ äärvast ää'nnem da kiõllvaajtummuž vuâmmšem.

Puk Lää'ddjânnmest mainstum sää'mkiõl lie vaarvuâla. Ko sää'mkiõli sââ'jj lij rââ'sš da jie'llemviõkksažvuõtt lij aštum, âlgg sää'mkiõli kâ'ddma šiõhtlõõttâd jee'rab tää'rkesvuõdin da õõlmâs kääzzkõõzzin da õõlmtõõzzin õnnum sää'mkiõl tää'zzest âlgg lee'd õll kvalite'tt. Lij vääžnai ää'nned huõl še sää'mkiõli suõmi jie'llemviõkksažvuõdâst kiõl'laž ree'ggesvuõđ seillam diõtt pue'ttivuõdâst. Seämmanalla âlgg mu'stted historiallaš määinaid da õinn vaaikteei tuejje'e'jid, kook lie viikkâm sää'mkiõlid änn'jõž vaarvuâlaž vuâkka da koi seu'rjõssân määng sâ'mmla lie mõõntam jie'nnkiõlâz. Tãn diõtt sâ'mmlaid lie vuäittam šõddâd činglõs pe'ccel, trauma da tõt lij vuäittam vaaikted jiõččtobddu. Hâ't sää'mkiõlid lie mââimõs ee'kkloo'jji ääi'j jealltam aktiivlânji da sää'mkiõli äärvast ää'nnem lij kaggâm, kiõllvaajtõõzz jie leäkku vââjjam ârstâ'tted. Määng oummu da piârri lie vâlddam kiõlâz määust, leâša tøn positiivlaž ouddnummuž taarbaš aktiivlaž tuâimid da tuärjõõzz kee'jite'meld. Sää'mkiõli mainstee'ji heterogeenlažvuõtt vuäžž kuâsttjed kiõllõõutstõõzzsteen.

Sää'mte'g'g lij tuärjjääm puu't'tõõzz määng tää'zzest, što tõt vuäitci va'stteed sää'mkiõli vue'jj jee'rab pie'li mie'ldez pohttam va'žžtõõzzid. Sää'mte'g'g âânn programmräaidast tää'rkes ä'sšen vuõiggkiõllsažvuõđ, di kiõllmäättlaž da kiõllhuõl'laž kvalite'e'tt. Mainstum kiõl âlgg lee'd hiâlpp fi'ttjed, ko juu'rdet prograamm täävtõsjoouk päärnaid da piârrijid. Prograammâst mainstum sää'mkiõll âlgg ee'ttkâ'stted še veiddsânji sää'mkiõl jee'res suõmmvuu'did. Muumlie'kk-programmräaid kuõskee'l Sää'mte'g'g haa'lad va'lljummses- da linnjummsesvui'm u'vdded jiõn sää'mkiõli änn'jõž jee'res haa'mid da kiõllmainstee'ji jee'res vuõ'jjid, vâjldââ'ttkani kiõl ree'ggesvuõđ da määnghämmsažvuõđ.

Sää'mte'gga kõskksaž täävtõs õhttsažpuu't'tõõzzâst lij ouu'deed da nââneed sää'mkiõllsaž jiõnnčuäjtõõllmõõžž kee'dd. Tuejjeem tää'zzest tät miârkkšââvv jiõnnčuäjtõõllâmcie'ppi kaunnmõõžž da sij ämmtallaš tuärjjummuž. Tuärjjõs âânn se'st še kiõl'laž vuâ'pstummuž. Muumlie'kk-programmräaid jiõnnčuäjtõõll'ji va'lljummsin va'sttâam tuâjj-joukk lij piijjâm tie'dd čuä'jtõõlliva'lljummsin oummui silttõ'sse ou'ddepu'htted aa'sšid da taiddu jiõnnčuäjtõõllâd. Õhtt kõskksaž priorite'tt lij ns. voice match kaunnmõš, kââ'tt miârkkšââvv, što roo'le kaunât pukin pue'rmõsân suâppi jiõn. Muumlie'kk-programmräaid kõskksa vuâddjurddi lie määngjiõnnsažvuõtt da jeârssi äärvast ää'nnem. Programmräaid pääi'k Sää'mte'g'g haa'lad še vuäžžad äigga šiõgg vuâd mainstummša sää'mkiõli änn'jõžvue'jjest da tõ'st, mä'htt mij vuei'ttep õinn jeallted, tuõ'll'jed da tuärjjeed sää'mkiõlid määng tää'zzest.